

Date – 12/12/2025  
Time - 7:30 -7:40 Hrs  
AKASHVANI AIZAWL

REGIONAL NEWS BULLETIN

**HEADLINES (MORNING)**

- 1. Ek Bharat Shreshtha Bharat hmalakna hnuaiah Mizoram Larsap General (Rtd) Vijay Kumar Singh hovin nimin khan Assam leh Nagaland State-te dinchamphaphak 'Foundation Day' lawmna chu Aizawla Durbar Hall, Lok Bhavan-ah neih a ni.**
- 2. Home Minister Pu K. Sapdanga chuan, Mizo zingah mi chhuanawm leh entawn tlak tak tak an la tam tih a sawi a, chung mite chuan chawimawina dawn an phu tih a sawi bawk.**
- 3. Election Commission chuan State panga leh UT 1 a Special Intensive Revision (SIR) of electoral rolls kalpui mek zawhfel hun tura ruat a pawtsei.**
- 4. Indigo chuan tun thla ni 3 leh ni 5 inkara thlawhna thlawh dan mumal loh avanga tuartute hnenah zangnadawmna cheng sing 1 theuh a pe dawn**

<><><>

**GOVERNOR**

**Ek Bharat Shreshtha Bharat hmalakna hnuaiah Mizoram Larsap General (Rtd) Vijay Kumar Singh hovin nimin khan Assam leh Nagaland State-te dinchamphaphak 'Foundation Day' lawmna chu Aizawla Durbar Hall, Lok Bhavan-ah neih a ni.**

**Larsap Kumar Singh chuan Assam leh Nagaland-te foundation day puala duhsakna hlanin, state pahnihte chu**

Mizoram ang bawka hnam ziarang leh danglamna ngah tak an nih thu a sawi a. Assam chu India hmarchhak tana luhka pawimawh tak, history mai bakah geography ang pawha hmun pawimawh tak chang a nih thu a sawi a. Nagaland chu hnam peng hrang hrang awmna leh kutthemthiamna avanga hriat hlawh a ni, a ti.

Mizoram Larsap chuan Sawrkar laipui hmalakna Ek Bharat Shreshtha Bharat programme chu India ram hnam ziarang leh nunphung hausa tak pholanna leh inhriatpawh tawwna tura buatsaih thin a nih thu a sawi a. India ram intodelh 'Vikshit Bharat' ni turin mawhphurhna, abik takin ram inghahna thalaite'n an neih nasat thu sawiin, Vikshit Bharat ni turin midangte hnam ziarang leh nunphung zir peihna, tanruala, inunauna tha leh inhriatpawhtawwna neih a tul thu a sawi a. Internet lamah thu dik tawk lo leh chi inthliarna lam hawi thu thehdarh a tam tih sawiin, kan zavaia him nan leh inpumkhat nan Ek Bharat Shreshtha Bharat programme hi duan a ni, a ti bawk.

Ek Bharat Shreshtha Bharat programme hian India rama State leh UT hnuaia cheng hnam hrang hrang, hnam ziarang leh nunphung inang lo tak takte inkara inpawhna tha zawk siam leh inhriatthiamtawwna nasa zawk siam a tum a. He programme kaltlang hian India rama State leh UT hrang hrangte dinchamphaphak Foundation Day lawmna chu Mizorama Lok Bhavan-ah Governor kaihhruaiin June, 2023 atang khan buatsaih tan a ni.



## **RUIHHLO DO**

Central YMA chuan kumpuan “ Ruihhlo Do” Duty chu nimin tlai atang khan an nei tan a. Duty bul tanna hun tawi hmangin Vice President leh Kumpuan Chairman ni bawk Prof. Lalnuntluanga'n a kaihruai a ni.

Duty tannaah hian CYMA President Pu R. Lalngjeta chuan, Hunpui an hma chhawn mekah ruihhlo a hluar chhoh zel avangin ruihhlo do kawngah theihtawp an chhuah tlan a ngai a ti a. Ruihhlo dotu te chu ruihhlo lakah kan fihlim a ngai tih sawiin tha thlah thei an ni lo, a ti. Polite tak si khawng tak

si in an thawk dawn tih sawiin, ram leh hnam thatna turin theih tawp chhuahin fimkhur tak in an kal dawn a ti a. Ruihhlo man danah pawh Dan ang thlapa man a ngai, a ti bawk. Ruihhlo zuar sim duh lo te, tha tak a sim tur a an tih sim duh lo te erawh dim an tum lo tih a sawi bawk a ni.

Central YMA hian nizan atang khan ruihhlo do beihpui an thlak tan a, ruihlo ngai an man te TBCC-ah dah zel an tum bawk.



## HOME MINISTER

Home Minister Pu K. Sapdanga chuan, Mizo zingah mi chhuanawm leh entawn tlak tak tak an la tam tih a sawi a, chung mite chuan chawimawina dawn an phu tih a sawi bawk.

Nizan khan HYVE Aizawl City Hall-ah Vanglaini chanchinbu chuan Mizo Award an sem a, mi hmingtha leh Mizoram tana tha thawh hlawk chawimawina award hi Pu B. Lalthangliana hnenah hlan a ni. Pu K Sapdanga chuan, Mizo thalai ten ngaihsan tur tha an hriat a, entawn tur dik a entawn theih nan leh an hriat theih nan Mizo Award chu buatsaih a ni tih a sawi a, kum thum danah mi pali hnenah award hlan a ni tawh tih a sawi bawk.

Pu B Lalthangliana hi Mizo chanchin zir chianga mumal taka chhuitu, Mizoram chung leh páwna Mizote leh Mizo history-te thlunzawma tizautu, mi nâwlpui hmuh theiha pho lârtu langsar ber te zinga mi a ni a; a thawhrimna leh taimakna vanga Mizo chanchin mipuiin an hriat a tam hle. Mizo hnam tobul chhuinaa sùlsutu a nih bakah, scholar-te tana thil thlir dan thar petu a ni a; Mizo history leh literature hmanga Mizoram chung leh páwna awmte inpumkhatna atana thawh hlâwk berte zinga mi a ni.

Award dawngtu tur thlang tur hian Selection Board din a ni a, Selection Board-in award dawng tur a thlante hnenah Vanglaini chuan Mizo Award hi a hlan thin. Kumin Selection Board chairman chu Lengzem editor Pu Vanneihtluanga niin, member dangte chu - Central YMA general secretary

leh T Romana College-a zirtirtu Prof. Malsawmliana, Pachhunga University College-a zirtirtu Dr Rohmingmawii, journalist Pu Adam Saprinsanga leh author Pu F Vanlalrochana, MPS te an ni.

Mizo Award hi tun hmain chief minister hlui Brig T Sailo, TNT dintu Pu Sangthankima, Prof. Joy L Pachuau leh zirna sang (higher education) lama thawh hlâwk tak Dr Tawnenga hnenah hlan a ni bawk.

Award hian nomawi leh pawisa cheng nuai hnih a keng tel a ni.



## SOLAR PUMP

Champhai North Bialtu MLA Pu H. Ginzalala chuan Neihdawn khawtlang mamawh, an tomato chinna hmun atana hman tur Tui chhoh Luan Project (solar Pump) a hawng.

He tuichhoh luan project hi Neihdawn khawtlang, Tomato chingtuten an mamawh a ni a, tui harsatna nasa tak an neih avanga harsatna an tawh thin thu chu Bialtu MLA hian a hria a, an harsatna sutkian sak dan ngaihtuah sakin tuichhoh luan project hi an ruahman ta a ni.

He hunah hian Bialtu MLA chuan, Neihdawn khawtlangin theihtawp chhuah a an hmalakna sorkarin a hria a, an harsatna sutkian a nih theihnan theihtawp tak meuh meuh an chhuah a, he tuichhoh luan project an hawn tak hi tangkai taka hmang a, tomato tam zawk an thar chhuah an beisei tih sawiin, ramchhung hmundangte entawn tur atana in thawhrim kan beisei a ni, a ti. Adviser to Chief Minister chuan a enkawl chungchangah khawtlang mipui ten mawh an phur a, dimdawi taka enkawl turin an beisei tih a sawi bawk.

Thusawitu dang Neihdawn VCP Pi Zodinsangi chuan tuichhoh luan project tihlawhtlin a nih avang a lawmthu sawiin, Neihdawn khawtlang in 80 atanga in 120 te hian Tomato an ching thei dawn ta a, hei hian kan khawtlang tan

mellung pawimawh tak a phun sak ta a ti a, an khawtlang chuan kum tin lovah an kalsan dawn a, hmun nghetah hna an thawk thei dawn ta a ni a ti a, Bialtu MLA hmalakna leh Neihdawn khawtlang a hmangaihna avangin Bialtu MLA chungah an khawtlang an lawmthu a sawi.



## ANNUAL ACTION PLAN

Nimin khan Saitual Bawrhsap Dr Lalngura Tlau hoin MGNREGA hnuaiyah kum 2026-2027 atana Annual Action Plan-te thlir ho a ni.

DC Conference Room-a hun hmanah hian, District Programme Coordinator (DPC)ni bawk Dr Lalngura Tlau chuan Block leh Zone atanga Annual Action Plan tha tak tak ruahman a ni chu lawmawm a tih thu a sawi a, kumthar atana lo inhmakhua lawk chu thil tha tak a nih avangin block leh zone level-a officer-te chu thawkrim deuh mah se an thawhrimna vangin hma takah tih fel a ni thin a ni, a ti. Chairman chuan sorkar tangka kum kal mekah nimin thleng khan Ni 73 inhlawh tawh a nih thu a tarlang bawk.

Meeting-ah hian Block level pahnih (2) atangin, Ngopa Block BDO Pi Dorothy Muansangin leh Phullen Block BDO Pu J Lalhmahruaia atangte, Saitual Zone atangin Pu Robert Lalnuntluanga, Tlau, APO atangtein MGNREGA (ni za inhlawhna) hnuaiyah Annual Action Plan FY2025-26 te pharh a ni a, hengte hi uluk taka thlir ho a nih hnuah pawm niin DRDO ah compile-a, secretariat ah a rang lama thehluh atan an dah.



## AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh [newsonair.gov.in](http://newsonair.gov.in) ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.



## **TOURISM MINISTER : WINTER FESTIVAL**

**Tourism Minister Pu Lalnghinglova Hmar chuan vnimin khan a pisaah chanchinbu mite kawmin, Aizawlah tun thla ni 15 atanga ni 20 leh ni 23-ah Winter Festival buatsaih a nih dawn thu sawiin, Krismas vuatvetah intihhlimna thianghlim tak, kohhran programme tibuai si loa buatsaih an tum thu a sawi.**

**Pu Lalnghinglova Hmar chuan Winter Festival-ah kum danga la awm ngai lo thil thar a awm dawn thu leh kumin Winter Festival thupui tur chu 'Krismas' a nih dawn thu a sawi a; December ni 23-a No Vehicle Zone-ah Krismas lam hawi costume parade leh carol a awm dawn a, Lammualah luhkhawm leh tur a ni dawn a. Lammual leh a chhevvel pawh Krismas theme-a chei a ni dawn a, charity stall a awm dawn tih sawiin He stall-ah hian mi changhai zawkte hnen pek leh tur thuamnaw leh thildangte a thawh theih dawn tih a sawi.**

**Winter Festival chu tun dinhmunah Mizote chauhin hlut mah se, nakinah chuan hnam dang pawhin an la rawn hluta an rawn tel ve ngei a beisei thu sawiin Tourism Minister chuan, hnam dangte'n Winter Festival chhim paha Krismas boruak rawn chhim an duh ngei a beisei a ti a, intihhlimna nen thianghlim taka kohhran programme tibuai si loa Mizo mipuite'n Krismas an hman chu an duh dan a nih thu a sawi.**

**Tourism Minister sawi danin Winter Festival-ah hian Mizoram pawn atangin artist engemaw zat an lo kal dawn a, concert hmuhnawm tak bakah lâm thiam, stall hrang hrang leh naupang intihhlimna leh infiamna te pawh a awm dawn tih a sawi.**



## **MYC PRESS CONFERENCE**

**Mizoram Youth Commission (MYC) Chairman Pu Malsawmzuala Ralte chuan ZPM sorkar hnuaiah MYC kaltingin thalai 400-in hna an hmuh tawh thu a sawi.**

MYC Chairman Pu Malsawmzuala Ralte hian nimin khan Aizawl Press Club-ah thuthar thehdarhtute kawmin, kum 2024-25 leh kum 2025-26 chhunga MYC hmalakna, hlawhtlinna leh hmachhawpte a tarlang a; MYC Chairman tarlan danin kum 2024-25 chhung khan Hotel Management, Food & Beverage hnuaiiah thalai 122-in hna an hmu a, kuminah mi 136-in an hmu tawh a, kumin sorkar kum kalmek ah MYC coaching class kaltlang hian mi 66-in sorkar hna an hmu tawh bawk.

Pu Malsawmzuala Ralte chuan National Skill Development Corporation nen tangdunin MYC Office Aizawlah Japan tawng zirna hawng turin an indawr mek thu a sawi a, MYC leh Taiwan sorkar thawhdunna kaltanga Mizo nula 1 Chinese (mandarin) tawng zir mek chuan a zo tawh a, a remchan danin MYC office ah Chinese tawng zirna hawn a nih dawn thu sawiin, Learnet Guwahati nen tangdunin MYC chuan Germany-a nurse hna thawk tur Mizo thalai 6 chu german tawng zir tura ziahluh fel an nih tawh thu te a sawi.

Maid Connect Project an kalpui kaltlangin Mizo thalai awmpui hna thawktute tan hamthatna leh venhimna tur duangin, kumthar lamah mumal zawka kalpui an tum thu Pu Malsawmzuala Ralte chuan sawi bawk.

<><><>

**SIR**

Election Commission chuan State panga leh UT 1 a Special Intensive Revision (SIR) of electoral rolls kalpui mek zawhfel hun tura ruat a pawtsei. Election Commission chuan SIR kalpui mek hi ennawnin Tamil Nadu leh Gujarat-a neih mek chu tun thla ni 14 a zawh turin a pawtsei a. Madhya Pradesh, Chhatisgarh, leh Andaman and Nicobar Islands ah chuan tun thla ni 18 thleng pawhsei niin Uttar Pradesh ah chuan tun thla ni 26 thleng pawhsei a ni bawk. EC chuan Draft Electoral Roll tlangzarh ni tur pawh a ennawn a. Goa, Gujarat, Lakshadweep, Rajasthan leh West Bengal-a enumeration tih chu nimin khan a hun a tawp a. Draft electoral roll hi tun thla ni 16 ah tlangzarh a ni ang.

<><><>

## INDIGO

Indigo chuan tun thla ni 3 leh ni 5 inkara thlawhna thlawh dan mumal loh avanga tuartute hnenah zangnadawmna cheng sing 1 theuh a pe dawn. Indigo chuan heng zangnadawmna hi travel voucher anga siam a ni ang tih sawiin thla 12 chhungin Indigo thlawhna an chuan leh hunah an hmang thei ang a ti a. Hei bakah hian sawrkarin kaihhruaina a siam bakah thlawhna thlawh chhuah hun bi tuk atanga chhiar leta darkar 24 chhunga thlawhna thlawk tur cancel sakte chu cheng sang 5 atanga cheng sing 1 thleng zangnadawmna a pe dawn bawk a ni..

<><><>